



LE GOUVERNEMENT
DU GRAND-DUCHÉ DE LUXEMBOURG
Ministère de la Santé

Äntwert vun der Madamm Gesondheetsministesch op d'parlamentaresch Fro n° 8220 vum 8. August 2023 vum Här Deputéierten Claude Lamberty an vun der Madamm Deputéiert Carole Hartmann.

Wéi gesäit d'Situatioun zu Lëtzebuerg aus? Ginn et Medikamenter fir Kanner, déi den Doktere haut scho feelen? Wa jo, wéi eng wieren dat?

Regelméisseg goufen zu Lëtzebuerg, esou wéi an allen europäesche Länner Liwwerungsenkpäss vun Medikamenter fir Kanner festgestallt. Et handelt sech haaptsächlech ëm den Amoxicillin an den Paracetamol. Och wann am Moment dës Produit'en erëm disponibel sinn, gëllt et nach ëmmer viirsichteg ze sinn, besonnesch am Fall vun enger Zounam vun Infektiounskrankheeten bei Kanner, déi eng gréisser Nofro vun dëse Medikamenter mat sech bréngen.

Wéi héich schätzt d'Madamm Ministesch de Risiko an, dass et dësen Hierscht a Wanter zu gréisserer Versuerungsenkpäss bei de Medikamenter fir Kanner kënnt?

Zu dësem Zäitpunkt ass et schwéier méiglech Liwwerungsenkpäss vun Medikamenter fir Kanner konkret anzuschätzen. De Gesondheetsministère rechent allerdéngs, wéi all Hierscht an Wanter, mat enger Zounam un Infektiounen vun den Otemweeër, déi eng staark Nofro un Antibiotiken an Medikamenter géint d'Péng an d'Féiwer wäerte mat sech bréngen.

Sou war d'Joer 2022 beispillsweis markéiert duerch en ongewéinlech fréien Ufank vun der Grippesaison, bedéngt duerch den Virus vun den Otemweeër (RSV), der Gripp vum Type A an B an verschidden aner Virusen déi d'Nofro vun Amoxicilline an vun Medikamenter géint d'Féiwer an d'Péng gesteigert hunn.

Wéi eng Mesurë si virgesi fir z'evitéieren, dass et dëse Wanter zu engem Manktem u Kannermedikamenter kënnt?

Op europäeschem Niveau sinn eng Rei Mesure vun der Europäescher Medikamentagence (EMA) virgesinn fir esou Indisponibilitäten ze verhënneren an un deenen de Gesondheetsministère bedeelegt ass. An deem Zesummenhang iwwerwaacht d'EMA, an Zesummenaarbecht mat der direction générale de la préparation et de la réaction aux urgences sanitaires vun der Europäescher Kommissioun (DG HERA), ganz no d'Offer an d'Demande vu verschidden Ënnergruppen vun Antibiotiken, dorënner den Amoxicilline, fir direkt op eventuell Enkpäss kënnen ze reagieren an des beschtméiglech ze verhënneren.

Wat d'Medikamenter géint Péng an Féiwer betreffen, , encouragéiert d'EMA esou wéi och den groupe de pilotage exécutif sur les pénuries et la sécurité des médicaments (MSSG), déi national Autoritéiten vun de Memberstaten, vu verschiddene Flexibilitäten ze profitieren, déi am reglementaresche Kader vun der EU fir pharmazeutesch Produit'en virgesinn sinn.



Et geet hei drëm, d'Liwwerung vu verschiddene Medikamenter ze erlaben déi beispillsweis an engem bestëmmte Memberstaat net autoriséiert sinn, oder verschidden Derogatioune virzegesinn (ganz oder partiell) déi d'Etikettéierung- an d'Verpackungsufuerderunge betreffen, fir esou eventuell Enkpäss ze verhënneren.

Do dernieft kënnen d'EMA an den MSSG déi verschidde Memberstaten ënnerstëtzen fir eventuell zousätzlech coordinéiert Mesuren ze huelen fir d'Situatioun vun den concernéierten Patienten ze verbesseren an déi ëffentlech Gesondheet an der Europäescher Unioun ze ënnerhalen, zum Beispill duerch eng direkt Interventioun bei den Hiersteller fir d'Fabrikatiounscapacités eropzesetzen.

Wéi eng Mesurë si virzessinn, falls dësen Szenario trotzdeem sollt antrieden?"

D'Mesuren déi mussen geholl ginn, hänke vun den Ursaachen vum Enkpass of. Well de Problem komplex a multifaktoriell ass, muss verschidde Mesuren op verschiddenen Niveauen geholl ginn déi souwuel national wéi europäesch kohärent mussen sinn. Onofhängeg vun den Aktiounen vun de verschiddenen Acteuren an der Fabrikatioun an Verdeelungsketten, mécht de Manktem un enger Rei essentielle Medikamenter e rationalen Ëmgang mat dësen Medikamenter zwéngend néideg.

Am Fall vun enger Pénurie vun engem bestëmmte Medikament kënnen Recommendatiounen un d'Dokteren betreffend d'Verschreiwen vun dësem Medikament, respektiv d'Asetzen vun alternative Medikamenter hëllefen esou engem Enkpass entgéintzewierken. Och Recommendatiounen un d'Apdikteren an un d'Patiente selwer kënnen an esou engem Fall derzou bäidroen esou en Enkpass ze iwwerbrécken.

Lëtzebuerg, den 8. September 2023

D'Gesondheitsministesch
(s.) Paulette Lenert